

20 JUL 1999

DR MAHATHIR LAKUKAN ACARA PELEPASAN LUMBA BASIKAL KEDAH

JITRA, 20 Julai (Bernama) -- Perdana Menteri Datuk Seri Dr Mahathir Mohamad hari ini menyempurnakan acara pelepasan peserta dan penyampaian hadiah Kejohanan Lumba Basikal Terbuka Kedah di sini.

Perdana Menteri yang diiringi isteri Datin Seri Dr Siti Hasmah Mohd Ali turut meluangkan masa selama sejam untuk menyaksikan acara itu sebelum bertolak ke tanah perkuburan Lubuk Batu, dekat sini untuk menziarahi makam Ali Yusof, seorang aktivis Umno di Bahagian Kubang Pasu.

Dr Mahathir turut menyampaikan hadiah kepada pemenang bagi acara Basikal Bukit Penuntut Sekolah Bawah 15 Tahun yang dijuarai oleh Md Sayuti Md Zaid dari Kelantan, diikuti pemenang tempat kedua Mohd Zamri Salleh (Terengganu) dan ketiga Che Hafizan Che Roza (Kelantan).

Ketika diminta mengulas mengenai kejohanan itu oleh juruacara majlis, Perdana Menteri berkata sukan lumba basikal agak popular di negara ini terutamanya bagi acara yang berlangsung pada waktu malam yang mampu menarik kehadiran lebih 50,000 orang penonton.

Beliau berkata adalah menjadi harapannya untuk melihat perkembangan positif ini berterusan di peringkat remaja bagi mencungkil bakat-bakat muda ke arah melahirkan pelumba negara yang mampu bersaing di peringkat dunia.

Dr Mahathir berkata berkat latihan yang dijalankan dan ketukunan peserta, tidak mustahil suatu hari nanti akan ada pelumba negara yang bertanding di Tour de France, salah satu kejohanan berprestij di dunia.

-- BERNAMA

MAN NMO